

Visoki predstavnik poziva političke predstavnike da osiguraju da BiH ne ostane van tokova

Visoki predstavnik, Paddy Ashdown, se danas susreo sa šefovima klubova poslanika onih političkih stranaka koje su zastupljene u Parlamentu Federacije Bosne i Hercegovine. Razgovor se fokusirao na pitanje reforme policije u svijetlu predstojećih ključnih pregovora o restrukturiranju policije koji će se održati od 24. do 27. aprila 2005. godine.

Visoki predstavnik je rekao da i pored toga što manji broj kriterija iz Studije izvodljivosti još uvijek nije ispunjen, "reforma policije predstavlja posljednju veliku prepreku koju BiH mora savladati kako bi započela sa pregovorima o potpisivanju Sporazuma o stabilizaciji i pridruživanju." Činjenica da je Evropska komisija prošle sedmice objavila da je Srbija i Crna Gora ispunila kriterije iz Studije izvodljivosti jasno ukazuje na to da članstvo u Evropskoj uniji, a ne destruktivna politika i savezništva iz prošlosti, predstavlja prioritet za susjedne zemlje", rekao je visoki predstavnik. Vodeći politički kadar u BiH – u Vladi kao i u opoziciji – sada imaju priliku dokazati građanima ove zemlje da su i oni opredijeljeni za postizanje ovog cilja, te da su sposobni da Bosnu i Hercegovinu uvedu u Evropu.

Naglašavajući da je Konsultativna radna grupa Evropske komisije spremna odobriti prelazak BiH u narednu fazu prilikom procjene ostvarenog napretka koja će se obaviti sredinom maja, visoki predstavnik je jasno naglasio da se "to može samo desiti samo ako su ispunjeni neophodni preduslovi." Takođe je dodao da "lideri u BiH moraju sada postići formalni sporazum o reformi policije, ili u protivnom preuzeti odgovornost za kašnjenje u ostvarenju ambicija BiH u pogledu priključenja Evropskoj uniji."

Visoki predstavnik je rekao da je Upravni odbor Vijeća za implementaciju mira, na sastanku održanom 7. aprila u Briselu, "naglasio da se predstojeći pregovori odnose samo na strukturu policije: dakle, ovi pregovori nisu zamišljeni tako da budu sastavnim dijelom debate o ustavnom uređenju BiH."

Visoki predstavnik je jasno naznačio da je cilj njegovog sastanka sa šefovima klubova poslanika bio da čuje njihova mišljenja i stavove. Takođe je dodao da se proces pregovora mora zadržati na razini ostvarivog, ali je u isto vrijeme ohrabrio sve zainteresirane strane da javno obznane svoje stavove kako bi se i njihova stajališta mogla uzeti u razmatranje tokom pregovora.

Visoki predstavnik je ponovno potcrtao potrebu postizanja kompromisa za koji je ocijenio da se može postići u mnogim oblastima. Međutim, u isto vrijeme je upozorio da "ne može biti nikakvog kompromisa u pogledu ispunjavanja principa Evropske unije" koji diktiraju da zakonodavne i budžetske ovlasti budu povjerene državnom nivou, da se policijske aktivnosti obavljaju u funkcionalnim područjima, te da se bilo kakav politički uticaj ukloni iz operativnog policijskog posla.

"Ukoliko uspijemo," rekao je visoki predstavnik, "ovi pregovori će omogućiti da se u BiH uspostavi funkcionalan policijski sistem, sistem koji može dobiti, a ne izgubiti, bitku protiv organiziranog kriminala. Ukoliko ne uspijemo, osudićemo BiH da ostane izvan glavnih Evropskih tokova. To nije odluka koju mogu nametnuti, već se radi o odluci o kojoj se moraju dogovoriti vaši predstavnici."